

**Naalakkersuisut peqquneqarnissaannik Inatsisartut aalajangiiffigisassaattut siunnersuut, inuussutissat pillugit nalerassamik anguniagassamillu siunnerfiliineq, nerisassanik peqqinnartunik assigiinngisitaartunillu innuttaasut nerisaqarsinnaalernissaat pillugu misissuinermik suliaqaqqullugit. Misissuinerup ilanngutissavaa Kalaaliminerit tunisassiarineqarneranni akitigut apparsarneqarsinnaanerit pillugu suliniutaasinnaasut qulaajarneqarnissaat.**  
(Inatsisartunut ilaasortaq Vivian Motzfeldt, Siumut)

### **Akissuteqaat**

(Peqqissutsimut Naalakkersuisoq, Agathe Fontain)

### **Siullermeerneqarnera**

Inatsisartunut ilaasortaq Vivian Motzfeldt siunnersuummut nassiunneqartumut Naalakkersuisut qutsavigaat.

Pitsaaliuineq peqqinnerulersitsiniarnerlu pillugit politikikkut sinaakkusiussaavoq Inuuneritta II, innuttaasut peqqissuunissaat pillugu Namminersorlutik Oqartussat piffissaq ungasinnerusoq eqqarsaatigalugu periusissiaat. Inuuneritta II-mi 2013-imi akuersissutigineqartumi 2019-ilu ilanngullugu atuuttussami aallutassat ilagaat nerisaqarneq. 2013-2019 iliuusissat ilaatigut innuttaasut tamarmik assigiinngisitaartunik nerisaqarnissamut periarfissaannik pitsanngorsaannissamik siunnerfeqarput.

Nerisaqarnermut Timigissarnermullu Siunnersuisoqatigiit innersuussutaasa innuttaasunit malinneqarnissaat, innuttaasullu taamaalillutik assigiinngisitaartunillu nerisaqarlutik peqqinnerulernissaat, aamma oqimaappallaalernermik, pualavallaalernermik nerisanillu pissuteqartumik nappaateqalernermik ineriartortitsinnginnissaat, Inuuneritta II-mi anguniagaapput. Siunnersuisoqatigiit nerisaqarneq timillu aalatittarnera pillugit innuttaasunut siunnersuutiniq qulinik siunnersuusiorsimapput. Nerisaqarnermut siunnersuutit marluk Naalakkersuisut immikkut maluginiaqqaat:

- Kalaallit nerisassaataannik nerisarit; akulikitsumik aalisakkanik aalisakkanillu qallersuusianik – Ukiup ingerlanerani pissarititanik uumasut imarmiut nunamiittullu paarlakaajaallugit. Paarnat naatitallu nunap pissarititai atortakkit. Ullup qeqqasiornermi aalisakkanik qallersuusiat aamma ilannguttarlugit.
- Suut nerinerlugit eqqarsaatigisaruk – Nerisaqarninni ileqqutit pisiniarninni aallartittarput. Peqqinnartunik pisisarit. Meeqqatit nerisassioqatigisakkit. Unnukkut nerineq ilaqutariinnut ataatsimoorfiutiguk.

Naalakkersuisoqarfik Kalaallit Nunaanni aalisakkanik tunisassioqatigisartut annersaannik atuisartut nerisassanik peqqinnartunik inuussutissartalinnik toqqaasarnissaat pillugu suleqatigiinnissamik isumaqatigiissuteqarsimavoq.

Naalackersuisut isumaqarput inuiaqatigiit peqqissuunissaat siullermik salliutillugulu nunami tamarmi kommuninilu politikerit ataatsimoorlutik akisussaaffigigaat, aammalu angajoqqaat, sullissiviit, minnerunngitsumillu inuit namminneq akisussaaffigigaat.

Kalaallit Nunaanni Nerisaqarnermut Timigissarnermullu Siunnersuisoqatigiit niuertut peqatigalugit ukiuni kingullerni sulissutigisimavaat aalisakkat qitiutinneqarnissaat, aalisakkallu qaerlaat annertunerusumik tuniniagaalernissaat. Aalisakkat nerisassaapput ukioq kaajallangajallugu nunamilu tamarmi pissarsiarineqarsinnaasut, aalisakkanillu nerisarnerup peqqissusermut pingaarutaat ilisimaneqarluarput. Aalisakkat nutaat niuertarfinni pissarsiarineqarsinnaanerisa annertunerusumik iliuuseqarfigineqarneranni pisaqarnermiit pisisartumut tuniniarneranut passussinermik eqqiluisaarnissamillu ilisimasaqarluarnissaq tunngaviuvoq. Taamaattumik tamanna nuna tamakkerlugu suliniutigineqassappat akuutitassat amerlaqaat.

Naalackersuisut Inuussutissat pillugit naalackersuinikkut nassuiaat 2004-mi saqqummiuppaat, tassani inuussutissanut tunngasuni naalackersuinikkut pingaarnerusutut anguniagaalluni nunatsinni nunap pissarititaasa sunniuteqarnerusumik atorneqarnissaat imminullu pilersorsinnaanerup annertusarneqarnissaa.

Inuussutissat pillugit naalackersuinikkut nassuiaatip 2004-meersup malitseqartinneqarnissaanut nioqqtissiorlut, tuniniaasut allallu soqutigisaqatigiit ilaatinneqarnerisigut inuussutissat pillugit nalerassamik anguniagassanillu naalackersuinikkut nutaanik siunnerfiliinermi periarfissanik qulaajaanermi ilaatinneqarsinnaapput. Kalaallit nerisassaataannit nioqqtissianik peqqinnartunik atuinnermi/tuniniaanermi akit appaartinnerisa sunniutaat misissuinnermi qulaajarniarneqarsinnaapput.

Taamaattumik inuussutissat pillugit nalerassamik anguniagassamillu siunnerfiliineq, nerisassamik peqqinnartunik assigiinngisitaartunillu innuttaasut nerisaqarsinnaalernissaat pillugu misissuisoqarnissaanik siunnersuut Naalackersuisut tapersersorpaat.